

12 MAR 1996

Sweden-Tiba

PASANGAN DIRAJA SWEDEN TIBA UNTUK LAWATAN NEGARA

KUALA LUMPUR, 12 Mac (Bernama) -- Raja Carl Gustaf dan Permaisuri Silvia dari Sweden tiba di Lapangan Terbang Sultan Abdul Aziz Shah di Subang dekat sini untuk lawatan negara lima hari.

Ketibaan mereka disambut oleh Perdana Menteri Datuk Seri Dr Mahathir Mohamad dan Datin Seri Dr Siti Hasmah Mohamad Ali.

Yang turut berada di lapangan terbang ialah Menteri Luar Datuk Abdullah Amad Badawi dan Menteri Pembangunan Usahawan Datuk Mustapa Mohamed, yang juga Menteri Pengiring bagi lawatan negara itu.

Pasangan diraja itu, yang tiba dari Singapura, diiringi anak lelaki mereka Putera Carl Philip, Menteri Perdagangan Luar dan Kerjasama Eropah Mots Hellstrom dan pegawai-pegawai kanan dari Istiadat Diraja dan Kementerian Hal Ehwal Luar.

Satu delegasi perniagaan juga tiba bersama rombongan diraja itu.

Kemudian, Raja Gustaf dan Permaisuri Silvia dibawa ke Medan Parlimen untuk diberi sambutan negara.

Di Medan Parlimen, pasangan diraja itu disambut oleh Yang di-Pertuan Agong Tuanku Ja'afar dan Raja Permaisuri Agong Tuanku Najihah.

Lagu kebangsaan kedua-dua negara dimainkan oleh pancaragam Rejimen Melayu Askar Diraja yang diketuai oleh Lt Norman Kamaruddin.

Raja Gustaf kemudian memeriksa barisan kehormat empat pegawai dan 103 anggota dari Batalion Pertama Rejimen Melayu Askar Diraja diketuai Mej. Rafizi Haji Shariff.

Raja Gustaf dan Permaisuri Silvia kemudian diperkenalkan kepada orang-orang kenamaan termasuk menteri-menteri kabinet dan pegawai-pegawai kanan kerajaan serta ketua-ketua diplomat asing.

Petang ini, pasangan diraja Sweden itu akan mengunjungi Tuanku Ja'afar dan Tuanku Najihah di Istana Negeri Sembilan, di sini.

Raja Gustaf juga dijadualkan mengunjungi Masjid Sultan Salahuddin Abdul Aziz sebelum melawat kilang kereta kebangsaan Proton di Shah Alam.

Permaisuri Silvia, yang mempunyai acara berasingan, akan melawat kilang pewter Royal Selangor International Sdn Bhd di Setapak sebelum menghadiri majlis taklimat Pasukan Petugas Anti Dadah Kementerian Dalam Negeri mengenai penyalahgunaan dadah.

Malam ini, pasangan diraja itu akan menghadiri jamuan negara di bangunan Parlimen.

Selain itu, pasangan diraja itu dijadualkan melawat Taman Orkid dan Akademi Ericsson. Raja Gustaf juga akan merasmikan penutupan Simposium Kesihatan Sweden esok.

Pasangan diraja itu akan melawat Sabah selama tiga hari mulai Khamis ini. -- BERNAMA

NZ NAK